




Ն.Ս.Օ.Տ.Տ. ԳԱՐԵԳԻՆ Բ. ԱՍԵՆԱՅՆ ՀԱՅՈՑ ԿԱԹՈՂԻԿՈՍԻ ՈՒՂԵՐՁԸ ՀԱՂԹԱՆԱԿԻ ԵՒ ԽԱՂԱՂՈՒԹՅԱՆ ՏՈՆԻ ԱՌԻԹՈՎ

Սիրելի ժողովուրդ ի հայրենիս եւ ի սփյուռս,

Հայրենական մեծ պատերազմում հաղթանակի հոբելյանական 80-ամյակը եւ Շուշիի ազատագրման ու Արցախի պաշտպանության բանակի ստեղծման տարեդարձները նշում ենք մեր ժողովրդի համար թանկ ու կարեւոր հիշատակներով:

Յուրաքանչյուր հաղթանակ ձեռք է բերվում հավատքով, անդուլ մաքառումով եւ փորձությունների դիմակայումով: Բազմադարյա մեր պատմության ընթացքում մեր ժողովուրդը անձնագոհաբար պայքարել է իր անկախ եւ արժանապատիվ կյանքի համար՝ մշտապես ձգտելով արդարության ու խաղաղության հաստատման: Այս գիտակցությամբ են հարյուր հազարավոր հայորդիներ խորհրդային Միության այլ ժողովուրդների հետ մարտնչել ընդդեմ ֆաշիզմի, հանուն ապահով ու բարօր աշխարհի հաստատման: Այս նույն գիտակցությամբ է ազգս նաեւ պաշտպանել արցախահայության հարազատ հողում անկախ ու անվտանգ ապրելու իրավունքը:

Սիրելիներ, այսօր էլ մեր ազգին ու հայրենիքին պատուհասած արհավիրքների՝ Արցախի հայաթափման, Հայաստանի առջեւ ծառացած մարտահրավերների հանդիման մենք պիտի աննկուն մնանք մեր ոգու արիության, հավատքի ամրության, լուսավոր ապագայի տեսիլքով եւ միշտ հիշենք, որ նշանակալի հաղթանակներ կերտել ենք միայն միասնականությամբ, հայրենիքի հանդեպ սիրով ու նվիրվածությամբ: Արդ, խոնարհում բերելով մեր հերոսների անմար հիշատակի առջեւ՝ ներշնչվենք նրանց պայծառ օրինակով եւ համատեղ ջանքերով ու միմյանց սատարումով շենացնենք մեր կյանքի անդաստանը նոր ձեռքբերումներով եւ ազգաշահ իրագործումներով:

Հաղթանակի եւ խաղաղության տոնի առիթով Հայրապետական Մեր սերն ու օրհնությունը եւ շնորհավորանքն ենք հղում Հայրենական մեծ պատերազմի վետերաններին, Արցախյան պատերազմի մասնակիցներին եւ աշխարհասփյուռ համայն մեր ժողովրդին:

Աղոթք ենք բարձրացնում աշխարհի խաղաղության, մեր հայրենիքի ու ժողովրդի անվտանգ, ապահով ու բարօր կյանքի համար եւ հայցում Բարձրյալից, որ այլեւս մարդկային կյանքում տեղ չգտնեն ֆաշիզմի սոսկալի դրսեւորումները, աղետալի պատերազմներ ու արհավիրքներ: Թող հարուցյալ Տիրոջ շնորհներն ու օրհնությունը լինեն մեզ հետ այսօր եւ միշտ եւ հավիտյանս, ամեն:

